



Jumat, 14 Mei 2021

Ogen: Perngandungen 5:1-10



Mekelek Ielis-elis



Ukumen dosa bapa nande nusur man anak kempu. Bageme penggejapen kalak Israel i taneh pembuangan. Icidahkenna arah renungenta enda nina, enggo erdosa nini nini kami, tapi gundari lanai ia ije. Gundari mesui ate kami mersan dosa-dosana. Kurang lebih 70 tahun i pembuangan Babel tuhu-tuhu jadi kiniseran si mesangat man bangsa enda. Menam kerina tangis ngandung nginget-ninget kai si enggo jadi man bangsana. Iturikenna kecibalna tupung i bas pembuangan e maka erta tading-tadingenna enggo irampas kalak, bangsa sideban ngiani rumahna, kaum bapa kerina ibunuh emaka enggo mbalu kerina ndehara. Lau si jadi inemen pe arus nggalar, kayu man ranting pe terpaksa itukur. Mekelek ia e ielis-elis ras itamaken baban si mberat bas kudukna. Kami iperintah bangsa budak, ise pe la ngasup mulahi kami i bas kuasana e nari. Pemunuh gawah-gawah arah juma-juma, labo kami bebas erdahin, iasamken kami kesah kami ndarami pangan, seh turah pinakit erkiteken lumben, kuling kami seri lasna ras ginuhur. Bagenda me kecibal bangsa Israel tupung paksa pembuangan.

Sada perenungen kepe ulih nadingken Tuhan, turah kiniseran si mesangat, la meherga i lebe-lebe jelma si enterem, ielis-elis, iperbudak kalak, turah pinakit, la lit ketenangan, la lit kecukupen, jadi kalak pertandang si lanai lit mperdiatekensa. Janah adi sirang ras Tuhan la lit gegeh ngalaken kiniseran si mesangat e. Bangsa si deban pe labo lit si rate mekuah. Sada nari ngenca dalam guna banci nerusken kegeluhen eme mindo penampat man Tuhan (berseru!). Si enggo lewat lanai terulih tapi banci ipekena terulin. Erpengarapen man Tuhan nambahi semangatta. Tuhan ngenca ngasup mpekena situasi ras keadaan bangsaNa, janah sura-suraNa kin pe gelah mulihken bangsa e man baNa. Bageme kata enda mpersingeti kita lako tetap ras Tuhan, ulu kegeluhenta.